

أشعار

بالعامية المصرية

ترانيم الوجد



شعر

هريدى على حسن

تراجم الوجد

فریدی علی حسن

ديوان شعر
ترانيم الوجع

شعر / هريدي على حسن
الطبعة الأولى
٢٠١٠

حقوق محفوظة للمؤلف

الإخراج الفني : عمرو المصري

الإهداء

إلى أمي الغالية ...

مصر

وإلى أولادها الشعراء

هريدي

لما الخريف

لما الخريف يخذك ..
والآهه تلعب بيك
والسحر يتخلى عنك ..
ويهرب من عينيك ..
هتيجي لقلبي تاني
وتسأل عن حناني
هتلاقي حب أكبر
يا حبيبي بيناديك

أنا أول حب شفته و رسمته بالورود

و ده قلبي اللي جرحته

وصارحته بالعهود

مسامحك ع الجراح

وهينسى كل اللي راح

لما هتجيله بكره ..

راح يقابلك بالورود

أنا الحب الكبير

أنا أول حب كانلك

أنا القلب الأسير

إسأل شوقه يقولك

أنا أول لقاك

أنا روعي معاك

وإسألها يا حبيبي

ماهى لساها معاك

هيفضل حبي يكبر
ولو جمالك ودّعك
هيزيد أكثر وأكثر
لو شوقك رجعت
هستنى على محبه .. تكفي كل الأحبه
لو نفرق للعوازل .. هيفضل للدنيا حبه
تعالى لقلب حبك
اختارك انت الوحيد
لعيون تتمنى قربك
مناه تكون سعيد
تعالى لي بالهوى
تعاليلي نكون دوا
أنا وانت ع الزمان ده ..
بالحب نكون سوى .

لو اقدر

لو اقدر أبعد عني هواه
لو بس قلبي يطاوعني
لكنه قلبي جه معاه
أقول له يهجر يلاوعني
أبعد عنه يشتاق إليه
أهرب منه ينده عليه

احترت وحدي أعمل إيه

لو بس قلبي يطاوعني

فكرت أعملها حكاية

قلت خصامه يسعدني

عملها قلبي سهر إيه

والليل بطوله يعاتبني

باقول هابطل دقاتي

وهسهرك ويا آهاتي

احترت وحدي أعمل إيه

لو بس قلبي يطاوعني

والشوق عملها لي حكاية

كل دقيقة يسأل عنه

يقول حبيبي دا مـنايا
وفي الحلاوه مافيش منه
ومين في الدنيا في جماله
يعمل حبيبي ما بداله
الشوق وقلبي متفقين ..
وعينيا تسأل حبيبي فين
احترت وحدي أعمل إيه
لو بس قلبي يطاوعني

مش فاهمني

حبيبي مش فاهمني
ما اعرفش أعمله إيه
واخد على خاطره مني
علشان باغير عليه
بحبه غصب عني
لأنه حتة مني
لو يبعد مره عني ..
أبات مشغول عليه

من سحر عينيه ..
بلاقي القلب يبات في حيره
وبيزود في اشتياقي
وسايبني ف نار وغيره
وهوا مش داري بي
مع إنه يا ناس حبيبي
بيزود ليه لهيبي
وانا روعي ما بين ايديه
مش خايف قلبي منه
ولا عمري أشك فيه
أنا بس باحس إنه ..
غروره ساعات ماله

وساعات بيسوق دلاله
أضحك واقول وماله
لو حتى عشان جماله
والسحر اللي ف عينيه
حبيبي مش فاهمني
مش عارف أعمل إيه

كلمه

كلمه واحده في سطر فاضي
قال وداع والاسم ماضي
واشتياقي يقول حبيبي
إتعذب ما دمت راضي
لا عمره هيجس بينا
ولا بكره هيناديننا

ارتاح أرجوك يا قلبي
إنساه واعتبره ماضي
إيه يعني دمعتين
هتبيكهم عينيا
وشوق وحب حنين
وليلنا يطول شويه
إيه يعني عمر في هواه
وسنين ضاعت معاه
وجرح وما فيش دواه
عليك وعليه قاضي
الورقة حتى قديمة
وكمان مش متسطرة
مش كانت عليها قيمة
وبالورود متعطرة

مابقاش يا قلبي فاضي
ما خلاص بقينا ماضي
وذكرى يا ريت ما كانت
ضاعت في سطر فاضي

اطمني

هأرحل بعيد عن دنيتك
مش هكون عقبه ف طريقك
مش هكون دمه ف عيونك
مش هاقول كنت حبيبك
ليالي وآهاتي وذكرياتك
وصورة أغلى من حياتك

جوه قلبي ما تخافيش

مش هشوفها

اطمني

ماخذعتيش

لازم اخرج من حياتك

إزاي وإمتي مش مهم

لازم احقق أمنياتك

ياحبيبتى ودا الأهم

قلبي يقدر ع البعاد

يهجر الشوق والعناد

ينسى يحلفلي بحياتك

أما جرحي مش مهم

مايهمكيش

يا مستحيلة ف وصفها
يا صورة مرسومه بحنان
يا أحلى آهه عشقتها
وعشتها قبل الأوان
هاشوف طريقه
أخبي الحقيقة
واحلف لقلبي ..
بانك بريئة
ما جرحتيش
اطمني .

ما عرفناش

ما عرفناش .. ما عرفناش
فجأة اتغير ما عرفناش
راح ونسينا وحب علينا
وقلنا هبيجي في يوم ولا جاش
كان بيحينا ويترجانا
علشان نعطف مره عليه

كان بيطير م الفرحة معانا
كنا نشوف الشوق في عينيه
واما زمانه ضحك له شويه ..
ما عرفناش
راح ماسألش ف مرة علينا
ما عرفناش
بكره هيندم على أيامنا
بكره يقاسي مرار الويل
اللي ظلمنا وباع أحلامنا ..
كل حياته هتصبح ويل
واما القلب اتعلق بيه
اما نشوفه بتجري عليه .

بعثها

بعثها من غير تمن
أيوه يا قلبي بعثها
بعث الخداع ويا المحن
وياريت زمان ما عشقتها.
تحن ليها .. تشتاق إليها
تقول حبيبه تفكرني بيها
ارتاح خلاص داوي الجراح
بيع اللي باعنا من غير تمن

مش كل دمعہ تبقي ندم ..
تصعب عليك تقول لي كان
كنا حقيقة بقينا عدم ..
وعمر غالي ف لحظة هان
إوعاك تصدق إنه داري بيك
إوعاك يا قلبي تقول لي حنان
مش كان حبيبي يوم وحبيبيك
باعنا ف لحظة مالوش أمان
ياما صبرنا وكل أماننا ..
يجينا نسامحه بشوق وحنين
كنا هتتسى كل جراحنا
لو كان سلم لو بالعين

بعد ما باعه يا قلبي حبيبته
بعد ما جرحه وبكى عينيه
وعرف الشوق وداق تعذيبه ..
جانا يقول الحق عليه
ارتاح خلاص داوينا الجراح
قلبي طاوعني وقال ..
بعثها .

مين يصدق

مين يصدق كل اللي بيتنا حنين ..
وبكلمه أصبح كان
في سطر كله أنين
كتب النهايه خلاص
ولسه فيك إخلاص
تقول حبيبي فين
باعنا عشان سطرين

كتب النهایه دموع بکره تشوفها عینیه
حوارها کان ممنوع والجرح صنع إیدیه
جردنا م الإحساس لازم تكون حساس

إصحی یاقلبی وفوق

باعنا عشان سطرین

هنجیب له قلب منین شوقنا وحب سنین
عشان حکایه یادوب کتبها من فصلین
دموعنا ماکتسبهاش وكأنه ماجرحناش

واسأل یقولوا ماجاش

أو ماشی من ساعتین

واللی یصدق مین .

حب يا قلبي

حب يا قلبي حب براحتك
حاول يمكن تبقى سعيد
حاول تنسي كل صراحتك
داوي الجرح بحب جديد
جرب يلاً وعيش بقي وقتك
حاول تفرح مرة ف عيد

إيه آخرتها وآخر صبرك
غير أشواقنا نارها تقيد
حب يا قلبي مين هيلومك
إن يوم جالك تبكي عينيه
حاول بس وداري همومك
واوعى يا قلبي تحن إليه
وان ماقدرتش إ وعد واخلف
جرب كل القسوة عليه
حاول تفرح مرة ف عمرك
حاول تجرح يوم العيد
آهه بتيجي وآهه تروح
جوه القلب منين ماتروح
آدي الجارح والمجروح
مين راح ييجي ومين هيروح

غير العاشق واللي مسلم
قلبه لا جرح ولا هواتعلم
غير الحب وعاش يتألم
إمتى يا قلبي ف يوم العيد
حاول مرة تكون البادي ..
إجرح أي قلوب تشتاقلك
كله يا قلبي أصبح عادي
أهجر أي عيون تندهلك
جرب مرة يا قلبي الحيله
ما تصدقش ان انت الحيله
حب وإنسى واهجر واقسى
حاول تفرح مرة ف عمرك
حاول تجرح يوم العيد .

فكر

فكر قبل ما تهجر فكر ..

إنك روعي وحيبي واكثر

انت هتقدر وانا مش هاقدر

أبعد لحظة لأ مش هاقدر

فكر قبل ماتهجر فكر

إني بحبك أكثر مني ليه بتلومني لما باغير

وازاوي تقدر تبعد عني إزاوي بس ياقلب كبير

خبت القسوة يا غالي منين
وانت يا روعي نبع حناني
نbec يكفي الدنيا واكثر
فكر

فكر فكر فكر ثاني
مش هتلاقي زي حناني
فكر قبل ماتصبح جاني
وتشكي الهجر كمان وتعاني
مش راح تقدر يوم تتساني
وان فكرت ف يوم تلقاني ..
شوق يندهلك جوا ف قلبك
ساكن حبي و حبك اكثر
فكر

جالك قلب تفكر تبعد
طب إزاي هيجيلك نوم
ليه يا حبيبي معايا بتعند
ليه هتسييني لشوق وهموم
قلبي بيسأل ع الأسباب
ليه الفرقة واحنا احباب
وإزاي بس يطاوعك قلبك
وتطاوعه ع الهجر وتقدر
فكر

فكر

فكر

أجمل قصة

أجمل قصة وهمّ جميلة
حكايتنا مش أي كلام
عشنا الحب وكانت ليلة
وصفوها ف دنيا الأحلام
جنه وفيها الوصل جميل
طارحه حنان وقلوب بتميل
مافيهاش غُصن ف حُبّه بخيل
مافيهاش فرقة وآه وألام

أحلى قصيدة حب يا قلبي
من بحر حروفه مجهوله
كتبوها بدموعي وحبّي
نظموها ف روي وبسهوله
وصفوها طبعاً ده محاله
مش ممكن لأ مش معقوله
شافوها من قبل ما اشوفها
عرفوها ف ظني ده أو هام
حسدوني من قبل ما اشوفك
أو حتى أفكر وتفكر فيا
لو شفتك أو شافوا رموشك
أو حسوا بعينيك في عينيه
إيه بس ساعتها هيجرالي
أصحابي هتصبح عزالي

لا قابلتك ولا شفت عينيك
وغرامنا عملوه أفلام
مش عارف إمتى كان امبارح
ولا بكره فاضل كام يوم
أنا أصلي في جمالك سارح
وانا صاحي وان شفت النوم
أنا راضي وعایش أوهامي
مش عايز يا عزولي كلام
كفايه هنايا ف أحلامي
حُسّادي مالهمش لزوم .

يارب أتوب

يا قلبي يلاً نتوب دا المولي بيسامح
عصيانا مش مكتوب ولا فعلنا الجارح
دا المولى خيرنا واختارنا أعمالنا
و يا ريتها كانت خير
يا ريتنا بنسامح

باب السما مفتوح واللييلة ليلة قدر
يارب ليك بنروح تدوم علينا الستر
نويت يارب أتوب وابعد عن الذنوب

هصوم واصلي الفرض
واعمل عمل صالح
يارب تقبلنا في شهرنا صائمين
يارب تجعلنا ف محبتك عاشقين
بحبيبك المختار وعبادك الأبرار
بفضلك واحسانك
وفقني اكون صالح
يارب كون لي معين
بحق ليلة القدر
بحق شهر الصوم
ونور نبينا البدر
باسمك المكنون .. وبحق كن فيكون
انصرنا يا رحمن .. ع الظلم والطغيان
ونصلي حمد وشكر .. ونغیر الطالح

آخر فرصه

آخر فرصه خلاص ضاغت
آخر دمعہ خلاص راحت
كنت راح انسى كنت هصالح
قبل ما تقسى كنت هتسامح
كنت بافكر اسمع قلبك
كنت هقول لك لسه بحبك
كنت هصارحك بس امبارح
آخر فرصه

كنت انا فاكِر حبي ربيعك
كنت بغير من قلبي عليك
ما تصورتش لحظه ابيعك
كنت باصدق سحر عينيك
كان القلب كثير يشتاقلك
ويصحيني عشان أندهلك
قبل ما تيجي يقول: افتحك
كان بيحسك كان هيقولك
لسه باحبك
بس امبارخ آخر فرصته
كنت بغالط فيك إحساسي
كنت انا فاكِر حبك ناسي
كنت اتحير لو اشوف حيرتك
كنت باصبر عيني بصورتك

كنت انا فاكرك يوم هتصوني

كنت باحبك أكثر مني

كنت بالومني

بس امبارح

آخر فرصه مالهش رجعه

آخر فرجه وآخر دمه

آخر مره تقول يا حبيبي

آخر يوم هتشوف تعذيبي

شفت عنيك بحنان ف عينيّا

شفت ايديك بتدوب ف ايديا

دقات قلبك

ويا مشاعرك

كل جوارحك

مشغوله بيّا .

بيودنا

طول عمره بيودنا.. ويسأل عننا
وان مره قولنا آه.. باقول انشاله انا
بقاله مده غايب.. كأنه مالوش حبايب
وشوق القلب قايد.. من بعده عننا
مش هاصبر لو دقيقة
هاروح له واسأله
وهاقوله ع الحقيقة
وعتابنا يعقله

مش راح اعتب يوم عليه
ولا اقول له بعدت ليه
ما الشوق عملها فينا
وحير قلبنا

هاقول له يا حبيبي
ماقدرش ع البعاد
سهرانه وزاد لهيبي
م الصد والعناد
حيرانه ويا صورتك
قلبي بيحبيب في سيرتك
لو حيرتي قد حيرتك ..
هتيجي قبلنا .

هات المقطف

هات المقطف هات الفاس
هات المصحف والكراس
نزرع غيطنا عشان أحفادنا
ونعلّي بالحب أساس
علشان يا ابني تواصل سيري
ازرع إيني اطعم طيري
ارسم لوحه تظهر واحه
وآمال تطرح حب الناس

إكتب إسمي بخط جميل
إشرب دائماً حب النيل
وان غنيت يوم ع المواويل
إو عاك تسمع للوسواس
إكتبني في الحب قصيدة
وحبيبتني إرسمها وحيدة
في جمالها أو في التهيده
دا ترابها يا ولدي بيتباس
أجدادك من عصر لعصر
أمجادهم من نصر لنصر
أحلامهم كانت علشانك
كتبوها بحروف من ماس
وادي دفتر أحوالنا في توشكا ..
أصبح يا ابني ليك نبراس

على حب الأوطان رببتك
على أختك وأخوك وصيتك
ع الاقصى والقدس وبيتك
دي الزرعه يلزمها الفاس
أنا في الجنة يا بابا اتهنى
أنا طائر من غير جناحات
جنبي حبيبي وقال لي اتمنى
والجنة مليانه حاجات
مكتوبه يا بابا لشهدائنا
والساهر في سبيل الله
ومنايا يا بابا تحصلنا
وتتهنى يا بابا دي جنات
— عهد يا ولدي أجيب النصر
واكتب إسمك ضهر وعصر

وهصلي لله الشكر
وهفرق يا ابني شرباتي
وتتحني للعُرس بناتي
وتغني بعودك بياتي
يا حبيبي النصر أهو آتي
إتهني يا ولدي إتهني
إوعى يا بابا تقولي سلام
إوعى تسلم قدس الأمه
بكره النصر مع الأيام
وبجهدنا هنزيل الغمه
وان طالت الايام الصعبه
هنخلي جماجمهم لعبه
وتكبر في القدس جنودنا
وشهدائنا ماهياش أموت

بتسَلِّمَ عِ اللّٰهِي بِيْتَمْنِي
رَاحْ أَبْنِي لِلْخَلْدِ دِيَارِكِ
وَهَنْكُتَبْ بِالنُّورِ أَسَامِينَا
وَهَشْرَفْ يَا ابْنِي مَقْدَارِكِ
وَنَزْوَقْ مِنْ تَانِي الْمِينَا
وَنَغْنِي وَالطَّيْرِ فِي سَمَانَا
وَهَبْفَرَحْ وَعَيْنِيكَ شَايِقَانَا
وَهْتَرَقِصْ كُلَّ الرِّجَالِ
وَالرَّايَةِ تَرْفَرُفْ عَلَيَّ بِيْتِنَا
إِتْهْنِي يَا وَلَدِي
إِتْهْنِي .

جيل ورا جيل

انا اللي جيل ورا جيل
متربي ع العِزّة
من الفرات للنيل
عاشق جمال غزة
بحب كل جميل .. ومهما طال الليل
هاترحل العوازل .. ونغني يا غزة

إبني كتب اسمك
والدم كان طباشير
وفي الخلود رسمك
عاشقه الجمال والخير
بكره ولادنا تقول
وتغني ع الأرغول
والفرح ليله يطول
بجهادنا يا غزاة
ياما محن وصعاب
وكننت أنا السيد
وكلنا أحباب
وبكره هنعيد
ونغني بنشيدك
يحلى في يوم عيدك

وترفرف الأعلام
ونهنى يا غزة
خلاص الفجر طالع
خلاص أن الآوان
يايديننا وبالمقالع
في القدس والجولان
وأخويا بكره راجع
يقول الله محبه
ونصلي الفجر حاضر
في الاقصى يا غزة .

على بابك

على باب الهوى عاصي
بيتمنى يارب يتوب
وكام يارب من عاصي
وبالقدرة صبح محبوب
واهو عايم في بحر هواك
بيتعبد في محرابك
بيتمنى يارب رضاك
بقي متهني في رحابك

على بابك حبيب جابني
وانا عاصي وكلّي ذنوب
ونور الحب اهو صابني
وفين أهرب من المكتوب
ندمت وجيت بقلبي ناديت
لا صومت زمان ولا صليت
ولا مرة في يوم زكيت
يارب اقبلني في رحابك
على بابك واقف مسكين
وكتابي م الهوى فاضي
باعدي الليل بدمع العين
وقلبي عنّي مش راضي

ونادم ع اللي كان مني
يا سامع في الظلام أني
منايا رضاك

وادوب في هواك
وأتعبد في محرابك
على بابك وكلّي ذنوب
وباتمنى يارب أتوب
يارب اقبلني في رحابك .

اللي عطاك يعطينا

اللي عطاك يعطينا يا عم
سحر ورقه وخفة دم
قلبي القاسي لرمشك سلم
فرحته ونسيته الهم
ماتكمل يا جميل فرحتنا
ونرقص جدعان حثتنا
ونفرق شربات الفرحة
أنا وانت ونروح للعم

نَسِيتَنِي الجرح وتَعْذِيبَه
رَجَعْتَ الأحلام من تاني
اِخْتَارَكَ قلبي يا حبيبَه
ولا غيرك هيكون لي أمانِي
يا هنايا لو تَرْضَى عليا.. وتَجِينِي تفرحني شويا
هَشِيكَ في حبابي عِينيا.. ونَخْلِي العزال تتغم
راح افرق شربات الفرحة
وهزوق بساتيني الطارحة
ويتهنى قلبي بحبيبَه
ونعطر بالحب الطرحه
هستنى إوعاك تتأخر
وعزولي يكيدني ويتمختر
هنجيب الحنه يا حبيبي
أنا وانت ونروح للعم

أنت المجروح

أنت المجروح وأنا الجارح
الحق عليا أنا غلطانك
تعالى عاتبني أنا وصارح
أهو قلبي معاك وبيشهد لك
فيها إيه يعني لو نتصارح
بالود يا غالي هنتصالح
لا أنت المجروح ولا أنا الجارح

راح ننسى الماضي وأيامه
هنسامح كل اللي جرحنا
وندأوي الماضي وأوهامه
بالحب نبدل ف آهتنا
إيه يعني كان اللي جر الننا
نظرة مجروح بس صابتنا
نرقيها يا روي ونتصالح
الحق عليا انا غلطانلك
ماخلاص عز الننا خلاص راحوا
خاينا ف بكره وافراحه
واهو خدنا الحب لأحلامه
إيه ذنب الشوق جوا قلوبنا
ونعذب فيه ويعذبنا
وأمالنا في الحب اهو طارح .

كان لينا

كان لينا حبايب يوم ..
تتمنى تشوف بسمتنا
لا نعرف خصام ولا لوم
والضحكة ترن ف بيتنا
تغريدها يلف الكون
بالفرحه منين ما تكون
تتحدى الصعاب وتكون

ولا مرة ياحب تسيبنا
ولا مرة عزول فرقنا
ولا بينا عتاب وجراح
وان كنا ف مرة بعدنا ..
لسه الأمل طراح
نسيتنا بشوق ومحبه
تتقابل قلوبنا بحبه
على خد الحبايب حبه
بالفرحه تعود لمتنا
بقينا يا ليل أصحاب
والآهه بقت في سيرتنا
من هجر ولوم وعذاب
ولا دمع العتاب قربنا

يا دنيا عملنا ايه
غيرتي المشاعر ليه
ولا احنا بقينا اغراب
والغربه دي بس لبيتنا
كان لينا حبايب يوم .

كل يوم

كل يوم نفس الحكايه
كل ساعة تكون في حال
تعمل الأشواق بدايه
وَألف حجه لكam سؤال
أقبل الأعذار وصالح
واعذر القلب اللي سامح
وانسى إنك كنت جارح
أعمل ايه القلب مال

كل يوم ..

تبتدي الصفحة الجديدة

إيه المعانده وإيه الدلال

وأي لحظة تكون سعيدة

بعد صبري وشوق ووصال

تطلب الصبر الجميل لا

بعد هجري دا مستحيل

ولأ يعني عشان جميل

تطلب الشئ المحال

ما عملتش حاجه حلوه

تفتكرها غير الخصام

ماكتبتش ألف غنوة

في عينيك أحلى كلام

يوم عاتبتك

وتتسى ليه إنك حبيبي
وتعاتبني ان يوم خاصمتك
بعد هجري مش حرام
كل يوم ..
اطلب مني الغالي يا غالي
كل حياتي شويه عليك
ما انت حبيبي وكل أمالي
وانت عينا اللي بشوف بيك
خاصم إعد سوق في دالك
راح تصفالي يوم واصفالك
مهما جرنا إحنا حبايب
مش هنصدق قولنا وقال .

مسموح لك

مسموح لك انت بس ..

تَحِيرَ قلوبنا

نشتاقلك مرة حِس

واسأل عننا

إشمعنا كنت زمان ..

تسأل عنا بحنان

إكمنو زاد جمالك
وماليش غير انت بس
مسموحك يا حبيبي تحير قلبنا
مسموحك تقسى
ونسامحك ع الجراح
نفكر فيك وتنسى
والقلب يقول سماح
امتى راح تفتكرنا
وتفكر يوم تزورنا
واشمعنا إحنا بس .. اللي تحيرنا بس
مسموحك يا حبيبي .. تحير قلبنا
مسموحك كل حاجه
حاجه واحده بس
حبي مش أي حاجه


وقلبي كان عنده حق
ينسى كل اللي راح
ويسامحك ع الجراح
لكن ينساك محال
لأه يا حبيبي لأه
لأه وألف لأه
الرد يا حبيبي.. لو حتى كلمه بس
إحنا زي ما احنا
الشوق بس اللي زاد
لو مرة تيجي رحنا..
لو حتى مافيش معاد
افرح ببك شويا
وتتهدى ببك عينيا
وحير قلبنا .

المحنوی

| | |
|------------------|----|
| لما الخریف | ۵ |
| لو اقدر | ۸ |
| مش فاهمني | ۱۱ |
| کلمه | ۱۴ |
| اطمني | ۱۷ |
| ما عرفناش | ۲۰ |
| بعثها | ۲۲ |
| مین یصدق | ۲۵ |
| حب یا قلبي | ۲۷ |
| فکره | ۳۰ |
| أجمل قصة | ۳۳ |
| یارب اتوب | ۳۶ |
| آخر فرصه | ۳۸ |
| بیودننا | ۴۱ |
| هات المقطف | ۴۳ |

| | | |
|----|-------|------------------|
| ٤٨ | | جيل ورا جيل |
| ٥١ | | على بابك |
| ٥٤ | | اللي عطاك يعطينا |
| ٥٦ | | انت المجروح |
| ٥٨ | | كان لينا |
| ٦١ | | كل يوم |
| ٦٤ | | مسموح لك |


رقم الايداع : ١٠٠١٧ / ٢٠١٠ .



كل يوم نفس الحكاية
كل ساعة تكون فى حال
تعمل الأشواق بداية
وألف حجة لكام سؤال
أقبل الأعذار وصالح
واعذر القلب الى سامح
وانسى إنك كنت جراح
أعمل ايه .. القلب مال

02.716
34454

Bibliotheca Alexandrina



0916148